

Gou Rox Hai Vaizdiet Iq Cae Naz Lo

上林县大丰镇皇周小学六(2)班 Lij Cinfungh/李俊峰

Yienznaeuz gou ngamq ndaej 12 bi, hoeng gou rox hai vaizdiet iq cae naz lo.


Youq duenh sujgyaj ngoenz ndeu haetromh, gou vanzlij fangzhwnz loq, sawqmwh deng geij sing heuh cau ndiu lo. Ya! Dwg daxgoeng cingq heuh gou! Gou sikhaek hwnqdaej cung roengz laj laeuz bae raen daxgoeng. Hoeng ra bae ra dauq cungj mbouj raen daxgoeng, gou laihnaeuz de gaenq roengz naz bae guhhong lo. Seizhaenx, baihrog dou yiengj hwnj sing: “Doed doed …”, dwg sing vaizdiet iq cae naz. O, daxgoeng caeux couh youq baihrog caj gou ne.

Gou cam daxgoeng: “Mwngz yaek bae cae naz ma?” Daxgoeng naeuz: “Dwg ha. Mwngz riengz gou bae lwi” Aen gihvei ndei dangqmaz neix gou gaej laugqvaq. “Gou bae! Gou bae!” Gou ganjvaiq dwk han naeuz. “Mwngz rox hai vaizdiet iq ma?” Daxgoeng cam dwk. “Gou sawqsawq yawj ba.” Gou benz hwnj dieg naengh vaizdiet iq bae, song fwngz gaem maenh bajsouj, gou roxnyinh aen gyaecij caizyouzgih saenqdaeddaed, saenq baenz fwngz gou ca di gaem mbouj maenh bajsouj lo. Daxgoeng lwnh gou baenzlawz ngomx, gya youzmwnz, gvadangj. Gou ciuq vah daxgoeng bae sawq lo, gya le di youz-mwnz. Fazdungjih “doed deed doed” sing gya vaiq haujlai. Hoeng vaizdiet iq mbouj byaij saek yamq,

dwg mbouj dwg gou loengh gihgi vaih gvaq lo. Gou gig simvueng, sikhaek diuq roengz ci daeuj. Daxgoeng raen le riu dwk naeuz: “Mwngz gvadangj gvaq la?” Gou fwt singj gvaqdaej. Youh caiq hwnj ci, gvadangj, menhmenh cuengq lizhoz roengz, aen gih cae naz vaizdiet iq menhmenh dwk byaij hwnjdaej lo……


Gou hai aen vaizdiet iq bae coh ndaw naz. daxgoeng itloh riengz gou byaij, sing hung gangjvah vix gou, itmienh vad fwngz son gou. Gou ciuq vah daxgoeng bae guh, siujsim dangqmaz menhmenh hai baenaj. Vaizdiet iq hai daengz gyaecij naz lo, aen caekhaex iq gou hix deng saenq baenz cungj mazmwd lo. Gou dingz le vaizdiet iq, hawj daxgoeng dawz vaizdiet iq hai roengz ndaw naz bae, gou hix riengz de roengz naz bae.

Daxgoeng dawz vaizdiet iq hai daengz ndaw naz le, roengzdaej, heuh gou hwnjbae, couhdwg heuh gou cae naz. Gou dangseiz ngaex yaep ndeu, hoeng lijdwg ciepsouh lo. Gou hwnj gwnz vazdiet iq bae, song fwngz gaem maenh bajsouj, aenvih dwg youq ndaw naz unqnemem byaij, caeuq youq gwnz diegbingz byaij mbouj doxdoengz, loengh mbouj ndei gou couh deng lienz vunz caeuq “vaiz” laemx roengz ndaw naz couh yakyawj lo. Gou dawz dangjvih diuh daengz sam dangj. Vaizdiet iq



haidoengh lo, gou ndaej siujsim hai de, byaij soh, ngeu, vuenh dangj, menhmenh dwk, gou hai ndaej yied daeuj yied swnhfwngz lo. Couh yienghneix, gou hai vaizdiet iq youq ndaw naz baebae dauqdaej, buenq aen cungdaej couh cae ndaej gaiq naz ndeu lo, daxgoeng daengj lwgfwngzmeh coh gou, gou riu ndaej bak mbouj haep. Duenh banhaet, gou laebdaeb cae liux sam gaiq naz, song gen gou cungj youh naet youh in liux, caekhaex hix maz caez lo, hoeng youq ndaw naz cienq bae cienq dauq, gou roxnyinh swheij lumj boux yinghyungz ndeu.

(lauxsae son'gyauq: Vangz Gveiyangh/黄桂香)



Gadah'iq

Mwngz guhlawz cungj mbouj lae daengz gwnz ndoiiba bae ne? Gadah'iq sawdikdik neix ha!

Yawj aen loekraemx henz dah de vei, daek raemx coq gohaeux ndaw naz gwnz ndoiiba baenzngoenz bae, dwgrengz lai lo, hojguh lai lo.

Vihmaz mwngz cungj dwg daj lajbya lae gvaqbae ne? Ga dah'iq sawdikdik ha, dwg bouxlawz gvidingh mwngz baenzneix guh ne?

Dah'iq ha, langhnaeuz gou dwg mwngz, gou couh mbouj ciuq gij gvidingh neix guh bw!

Gou aeu lae hwnj daengz gwnz ndoiiba bae dahraix, gag lae bae ndaw naz ndaem gohaeux de bae.

Gizlawz aeu gou, gou couh lae bae daengz gizde, couhsuenq bya sang roen lingq, gou goj lae bae daengz gizde bae!

Gou aeu lae bae daengz gwnz ndoiiba bae dahraix, lae daeuj daengz henz ranz gou. Yienghneix, bohme haeujsaemh guhhong dauq ranz le, couh mbouj hoj bae daengz laj bya rap raemx lo, mbouj hoj rap song doengj raemx naekgywdgywd byaij ga roeniq lingqlaulau raeuzradrad de lo.

(Daj《Bonjsei Sim Lwngnyez》(Veiz Gizlinz raiz) senj okdaej, Lwgfwnzgmeh/卢奋长 hoiz)

Aen Goj Ndaekvuengz Guekduzgoep

Miz aen daemz iq ndeu, ndawde miz haujlai duzgoep, gyoengqde yienghsiengq doxlumj caez bae, mbouj rox byawz dwg byawz, danhseih gyoengde guhdoi youq huzndei dangqmaz.

Miz ngoenz ndeu, miz ndaekvuengz guekduzgoep ndeu daeuj gizneix cunz-yawj. Gyoengq goep gizneix caez daeuj baiz youq ndei, angqcoux ndaekvuengz daeuj neix. Ndaekvuengz duzgoep daengz lo, de gwnz gyaecij daenj coq aen mauh-vuengz henjgim henjgim ndeu. Ndaek-vuengz neix ngiengx gyaecij hwnj mbwn bae, ndaenggon dangqmaz le yawj gyoengq goep ndaw daemz neix, naeuz: “Sou gag yawj gyoengq sou, yienghsiengq sou ‘yaez’ lai, baezlawz mbouj cang yiengh

ndei yawj di ne?”

Miz duzgoep iq ndeu cam duzgoep geq: “Gij maz heuhguh ‘yaez’ ne?”

Duzgoep geq han naeuz: “Ndaek vuengz neix dwg naeuz raeuz yiengh yaez lai, mbouj ndei yawj.”

Duzgoep iq yawj ndaekvuengz baez ndeu, liuxle lejsing naeuz: “Ndaek-vuengz neix yiengh caeuq raeuz doxlumj, couh lai daenj aen mauhvuengz ndeu ndwi bw!”

Seizneix miz raq rumz ndeu ci gvaqdaej, ci aen mauhvuengz de doek bae, aen mauhvuengz de doek le ringx haeuj ndaw mieng bae. Gyoengq goep mbouj haeujsim yawj gijneix. Gvaq yaep ndeu, gyoengqde yawj mbouj raen ndaekvuengz lo, cungj simvueng dangqmaz.

Seizneix, gyoengq goep ndawde miz duzgoep ndeu naj coh daihgya hemq naeuz: “Gou dwg bouxvuengz, gou dwg bouxvuengz.”

Gyoengq goep cungj riu de: “Mwngz suenq gijmaz bouxvuengz?”

Duzgoep haenx youh hemq naeuz: “Gou couhdwg bouxvuengz, gou couhdwg bouxvuengz!”

Gyoengq goep doengzcaeaz riu naeuz: “Sou yawj la, duzgoep neix baenzbingh lo.”

Neix liuxle, gyoengq goep couh doengzcaeaz doq riu doq bae gaeb non, dandan lij lw ndaekvuengz mbouj daiq mauhvuengz haenx youq gizhaenx haengrengz hemq bae hemq dauq……

(Gyaz Swjyenh)

